

Kunjungan Najib Sempena Rumah Terbuka Malaysia Deepavali Ceriakan Tiga Keluarga
Bernama
17 November, 2012

SUNGAI SIPUT, 17 Nov (Bernama) -- Perdana Menteri Datuk Seri Najib Tun Razak yang berada di sini sempena sambutan Rumah Terbuka Malaysia Deepavali 2012, meluangkan masa mengunjungi tiga keluarga masyarakat India di Kampung Ramasamy, Ladang Dovenby.

Kunjungan Najib pada 4 petang itu disambut dengan kalungan bunga malai serta diiringi paluan gendang oleh sekumpulan anak muda kaum India yang berpakaian tradisional 'vesti' dan 'jippa'.

Yang dikunjungi ialah keluarga bekas penoreh getah S.Subramaniam, 84; keluarga pekerja kilang R.Loganathan, 39; dan R.Suppammah, 75, penoreh getah.

Majlis sambutan Deepavali di Ladang Infoternak di sini turut diiringi Menteri Penerangan Komunikasi dan Kebudayaan Datuk Seri Dr Rais Yatim, Menteri di Jabatan Perdana Menteri Datuk Seri G.Palanivel yang juga presiden MIC, Menteri Besar Perak Datuk Seri Dr Zambry Abdul Kadir.

Najib meluangkan masa hampir setengah jam dengan bertanya khabar serta berbual-bual bersama keluarga itu dan menyampaikan sumbangan wang tunai, barangan keperluan rumah serta komputer riba untuk anak-anak yang bersekolah.

Najib kemudian menaiki traktor berhias dengan pemimpin masyarakat yang lain menuju ke perkarangan Ladang Infoternak sejauh satu kilometer dari kampung itu untuk sambutan Rumah Terbuka Malaysia Deepavali 2012.

S. Nageswari, 37, yang merupakan menantu kepada Subramaniam berkata ayah mertuanya itu mengalami lumpuh separuh badan namun apabila diberitahu Najib akan datang ke rumahnya, warga emas itu sangat ceria dan sering bertanya bila perdana menteri itu akan tiba.

Loganathan yang tinggal bersama isteri dan tiga orang anak di situ selama 30 tahun berkata, selama ini mereka tidak pernah terfikir pemimpin tertinggi negara seperti Najib akan menjejaki kediaman mereka.

"Kita faham, walaupun perdana menteri mempunyai kerja yang sangat sibuk, beliau sempat ke rumah terbuka dan datang ke kampung ini dan ke rumah kami, kedatangannya bersejarah untuk keluarga saya," katanya.

Sementara itu, Suppammah berkata beliau kini lebih gembira tinggal di rumah yang dibaik pulih dan dicat baru hasil bantuan Jabatan Hal Ehwal Khas (Jasa) dengan kos sebanyak RM5,000 di bawah program Prihatin 1Malaysia jabatan itu.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=709630>